

四庫全書

史部

欽定四庫全書

平定兩金川方略卷八

九月辛酉

上諭軍機大臣曰前據董天弼奏從木坪之堯磧地方
順山而下中隔一河即係達木巴宗若由捷徑前進
易于攻破一面帶兵五百名星速起程一面飛商阿
爾泰等語此摺于九月十五日奏到距今又將十日
尚未據將進兵以後情形奏聞其與阿爾泰相商之

處作何辦理亦未據阿爾泰等奏到殊不可解計該提督進兵之程日以五十里為率旬日當行五百里即以三十里為率亦可行三百里小金川疆界並非甚廣豈有行三五百里尚不能直抵賊巢之理是董天弼前奏仍不免沿綠營積習徒以空言塞責而阿爾泰又視董天弼之進攻與否不以為意遂置之不論耳豈知朕于此事宵旰屢念自聞董天弼得路進兵之說即日計其行程盼其信息伊等何總不知仰

體朕意隨時奏報乎行兵之事大小悉係機宜計日計程雖若細務而實為軍營要領非此不能得先後緩急之宜籌克敵制勝之策朕前此辦理金川及平定準部回城諸務悉皆詳為指畫鉅細不遺用能尅期奏績阿爾泰董天弼何皆視軍旅若泛常于進兵情形並不隨時入告以待朕之揆機遙度得所稟承乎看來阿爾泰等于攻勦小金川一事並未通盤籌畫布置得宜即董天弼之間道進兵亦不過擊其

欽定四庫全書
卷八
一隅實未嘗計及全局如此安能有濟著傳諭阿爾
泰董天弼仍將現在進兵實在情形迅速覆奏

臣等謹按軍營機要隨步換形自應迅速奏聞
始得以隨機

指示而閫外獲所稟承以圖制勝臣等仰見

皇上厯懷軍務每飯不忘即至宵漏已深曉籌未啟猶
復時垂

清問暨乎奏報一至無分早晚靡不詳悉批閱再三

訓諭于先後緩急之宜指陳曲當蓋

宵旰勤勞實為自古所未有是以萬里之外視猶指掌而遽旗所抵之處悉不久而奏膚功也

丙寅福昌奏言

臣

于七月初二日抵卧龍關同提

臣董天弼商辦進兵緣巴朗拉正面山高路險俱係仰攻有費兵力是以提臣由山神溝一路進攻

德爾密令

臣

由鄧仍一路誘敵相機攻取巴朗拉

八月初七日

臣

分領漢土官兵一千三百名于初

八日至鄧仍查看自鄧仍起至巴朗拉山頂約計五十餘里賊人已經防守若由正面進攻寔費兵力惟從巴朗拉北面山梁繞越或可攻取十二日先派瓦寺土兵一百名前往暗伏抄截十三日派令守備李春勝等帶兵分作三隊臣亦帶兵二百五十名黑夜一同進發繞至巴朗拉之北十四日子刻鼓勵官兵上前奪獲賊卡三座及進攻巴朗拉正面碉房三日三夜官兵不無傷損又因山上

雨寒天冷准董天弼來札以賊番甚衆未可輕進
令撤回山神溝防備董天弼亦于二十三日撤回
九月初七日改由木坪一路直抵達木巴宗令臣
嚴守要隘候信再進俟其知會到日即為竭力進
攻但臣統率官兵不能奪寨過山且愚昧未及奏
聞伏乞將臣交部治罪奏入

上諭軍機大臣曰辦理小金川一事阿爾泰等毫無措
置種種不合機宜其應得罪譴者不獨福昌一人福

昌此時且不必交部看其將來如何奮勉自効以圖立功抵罪

丁卯

上諭內閣曰德福借滇省事宜欲以諷罷小金川之事阻撓軍務妄奏取巧深負朕恩著革去總督賞給三等侍衛前往伊犁聽候差委所有四川總督員缺著文綬補授

十月庚午阿爾泰奏言

臣等前此收復訥頂等處

地方一面飛飭該將備等務即相度機宜乘勢掩殺臣又于九月初二日親往章谷軍營督催攻勦節據宋元俊稟稱自官兵渡河之後帶領土百戶等連日奮勇進攻又收復仲濃大寨索布密剛瑪哩五處殺死小金川大頭人一名小頭人二名暨賊番二百餘人生擒五十餘名我兵陣亡二名帶傷四十餘名其明正土司碉寨七百餘所已全克復又攻得小金川噶中拉莫茹納扎功拉四處地

方現在進攻小金川約咱大寨等語臣現同副都
統鐵保督催官兵奮力攻擊以期深入其收回明
正番民碉寨業交明正頭人管領安插寨內藏匿
被擒之賊照例分賞各土司其陣前擒獲及訊明
曾經抗拒者立即正法使助惡逆番喪胆漸可解
散至我兵傷亡者查明咨部卹賞再董天弼改由
木坪一路間道進攻所需兵糧亦經趕辦以資掩
襲之用奏入

上諭軍機大臣曰阿爾泰奏克復明正土司被侵之地并攻得小金川噶中等四處現在進攻約咱大寨所辦畧有起色蓋阿爾泰因朕節次飭諭實力督催將弁等亦稍知自勵因得屢獲克捷可見人果奮勉向前其效立見阿爾泰益當加意董催乘勝深入直搗賊巢前諭令溫福赴川督辦并諭阿爾泰此時且暫停攻勦俟溫福到後合兵進討尅期集事昨又授文綬為四川總督令其赴川助辦今阿爾泰既已得手

正可鼓其銳氣一往直前併促董天弼等上緊夾攻
兼派練習帶兵之將領分路合攻使番酋首尾不能
相顧自可得制勝要領不必拘泥前旨坐待溫福文
綬若能于此時即抵賊巢擒獲僧格桑分定其地尚
係阿爾泰全功設因此次小勝遂存自足之心不復
努力非惟自怠垂成事機可惜且溫福文綬到後掃
穴擒渠其功即與阿爾泰無涉矣至遊擊宋元俊勇
往立功殊堪嘉獎遇有川省副將缺出即行奏補其出

力之各土司業將俘獲番衆分給所有跟隨宋元俊
進攻之土百戶等阿爾泰亦當量加獎賞以示鼓勵
癸酉阿爾泰奏言小金川悉其番衆固守約咱隘
口以拒我兵進取之路臣現于軍營鑄造大砲擊
其堅礮但有可進之路竭力攻取奏入報

聞

丙子溫福奏言臣思小金川賊酋敢于負嵎逆命
自當急為勦滅以靖邊徼臣恭接

諭旨當將滇省關隘巡邏諸事交海蘭察哈國興盡心
經理至由永昌赴川必由貴州之威寧畢節一路
此外山徑崎嶇向來從未設有驛站且民夫牲畜
稀少難以遠行臣思川省事關緊要早到一日即
得早籌一日是以于本月二十八日恭請印信起
程所有滿兵二百名交與叅贊大臣五岱同副都
統常保住莽堪察率同侍衛章京等于臣起身後
間日分起帶領陸續前赴川省至本年新調黔兵

三千名原為進剿之用今未經出口無虞疲乏且
伊等均經配給軍械若以之全數帶往川省更為
妥便擬于滿兵之後亦即分起赴川其雲南昭通
鎮總兵馬彪屢經出師勇往幹練且曾任四川
北鎮總兵于彼處情形尚為熟悉應將赴川黔兵
三千名令其統領前往奏入報

聞

辛巳

上諭軍機大臣曰昨阿爾泰奏攻擊碉卡情形以堅碉林立賊衆固守未能攻克為詞其意專在攻碉此外竟無分毫籌畫賊人既設碉固守我兵即奮勇攻擊賊衆亦必悉力支持不惟曠日玩時且恐兵丁或有傷損昔年訥親辨金川之事曾以撲碉獲罪阿爾泰等何必欲蹈其覆轍且賊人碉卡不過設于要隘之處並非凡有路徑俱築碉卡自當繞越堅碉密探間道往攻使賊人力不能及失其所憑方合避實擊虛

之道阿爾泰縱不爛于軍旅豈于事理當然亦情無
體會實不解其何意

甲申阿爾泰奏言查董天弼進兵山神溝時脩辦
軍糧以為寬裕因由間道密進各兵携用乾糧不
舉烟火以防賊番知覺並非乏糧至臣前因賊番
在木坪連界地方添修碉卡即令遊擊陳聖矩帶
兵駐扎夾金達以為防禦並令侯西路兵練將抵
達木巴宗即行夾攻昨准提臣扎稱由木坪堯磧

進兵臣因堯磧與甲金達相近已飭知陳聖矩相
機策應至提臣若由堯磧攻退賊番兵抵達木巴
宗層次取道約一百二十里即至小金川美諾
巢穴臣于南路進攻約咱大寨係小金川要隘攻
破後層次而進約一百七十里至小金川美諾
由此兩路夾攻可期掃穴再臣訪有小金川汗牛
地方間道一處據土番云由索布行二日至汗牛
又行二日至美諾約三百餘里較約咱一路距美

諾巢穴稍遠臣現差人確切查探另行酌辦惟是約咱地方賊番日見增加恚力固守臣所調滿漢兵練共七十餘名因收復明正地方七處及攻獲小金川碉寨四處均須分兵防守又附近章谷之茂紐東谷剛察等處與革布什咱地方止隔一山金川現在駐兵草地亦須派兵防範其餘兵力專攻約咱一路異破此路要隘即可統兵進取奏入上諭曰仍屬無策覽奏增憤懣耳

戊子阿爾泰奏言竊臣攻打約咱一路自克獲噶
中茹訥拉莫等處地方後續又攻得附近約咱小
碉三座賊番于昏夜爬山潛來偷奪當經哨兵望
見各將備等率兵奮力迎殺追趕賊番逃逸查驗
鎗斃賊番五十六人割獲首級十三顆生擒三名
叅將鄭國卿等俱得石傷漢土兵練內受傷一百
六十餘名陣亡二十八名除分別給賞並飭嚴密
防守外又飛行藩司將該路兵糧于就近措辦源

源運濟現已運赴軍營米二千石麵一萬觔尚有
續辦米石隨即運往並辦火藥等項以資官兵併
力合攻奏入

上諭軍機大臣曰阿爾泰奏續得小碉三座並掩殺潛
來奪碉之賊稍覺奮勉所有出力攻碉殺賊之弁兵
等自應確查錄記俟事竣通行核辦其在事兵練之
傷亡者亦應查明照例分別賞恤今既續得賊碉殲
戮番衆已少挫賊人之氣自當乘勝深入阿爾泰可

不急思奮勉以圖挽益乎惟阿爾泰稱九月初二日
起程初七日至章谷其地相距四百餘里何至需期
六日況軍行機要刻不容緩不應濡遲若此至所稱
辦運軍糧火藥接應之處均係行軍要務但現在溫
福自滇帶赴川省之滿洲兵及黔兵共三千餘名而
川省各鎮營兵續有添派兵數較前倍多則糧餉亦
當籌脩無缺而所需火藥鉛丸尤關緊要必須寬裕
預脩方為得力設臨時供用稍有不敷惟阿爾泰是

問

己丑

上諭軍機大臣曰番夷之性貪利忘義易于動搖何未聞設法招降令其自成瓦解著傳諭阿爾泰等當于大兵攻剿之處遍諭賊人以爾小金川原係內地土司所有番衆即與中國百姓無異向俱安享太平此次官兵進剿皆因僧格桑去歲甫受約束歸巢復敢故違號令抗拒天朝其罪專在僧格桑一人與爾衆

番無涉且僧格桑自作不靖致爾等大受其累何必復為捨死出力棄家室而蹈危亡雖至愚不應出此今將軍已統大兵齊到即日奮攻爾等若能深明禍福速棄碉卡各詣所在軍營投順原可宥其已往仍為良民較之助賊戕生孰得孰失其各頭目內如有能將僧格桑擒獻者必當奏聞大皇帝厚加恩賞是為爾小金川除一作孽害衆之僧格桑爾番衆仍可安保無事若執迷不悟大兵一到玉石俱焚傳諭之

際即將前日所獲之賊番三名梟首號令諭以此係
黨附僧格桑之賊經官擒獲法所必誅今即為不知
棄逆降順者示之榜樣本閣部堂憫爾等愚蒙不忍
槩行誅戮故為明白宣諭利害所在爾等自擇之如
此詳切諭示使賊自相解體臨之以大兵聲勢賊必
不能如前支拒自為事半功倍

同日阿爾泰奏言查兵動糧隨最關緊要今副將
軍溫福帶領八旗勁旅並黔省官兵及成都滿兵

一千名指日到齊更須寬裕預脩隨令軍需局司道飛飭附近各州縣即將倉穀碾動趕運另行買補選倉併照例雇夫按站安設以便于運送至官兵所需乘騎馬匹一面分飭各營派撥一面催脩民馬分站應付其火藥火繩鉛丸等項皆軍營必需之物現已分飭各鎮協營上緊置脩併飭督提兩標中軍在省脩辦令其飛送軍營所有應用銀兩均于貯脩軍需項下動支再前因小金川侵佔

明正河西地以致章谷大河不能經過是以趕造
木船濟渡今河西一帶地方既全收復且即日大
兵雲集尅期前進船隻究難容載多人現將前項
般隻聯絡成橋用竹索纜結縛牢固以利師行奏入
上是之

庚寅董天弼奏言臣于九月三十日到木坪先行
查看道路自小關子起至堯磧一帶多係山岩一
至堯磧以外即可直抵甲金達現在甲金達地方

已有陳聖矩帶兵前往小金川亦于附近要隘修
立戰礮臣擬先破戰礮佔據形勝則東北可以救
援達木巴宗西北可以覓路進攻抵小金川之美
諾與出木布爾桑岡等處較為便捷況甲金達一
路天氣尚為和暖非比卧龍關外早有冰凍之患
臣現在挑取精銳由堯磧前進計十月二十三
四兩日督兵攻奪奏入報

聞

辛卯桂林奏言

臣仰蒙

諭旨馳赴四川會同阿爾泰辦理軍務于十月十三日
抵成都府見藩司李本臬司李世傑將軍需應辦
事件逐條細詢據稱三路共調漢土官兵一萬六
千五百名碾運食米十二萬七千三百餘石已運
四萬一千四百餘石未運八萬五千九百餘石運
送糧米藥彈等項共僱民夫一萬二千二百餘名
安設台站遞送文報採買馬一千五百三十二匹

等語伏查官兵糧米西路卧龍開業已運有一萬
八十七百石目下自敷支用惟南路章谷木坪二
處官兵較多糧米尤為緊要現在查明川省倉穀
共有一百七十萬八千餘石除節次碾過二十五
萬四千六百餘石外尚存穀一百四十五萬三千
石有零可以陸續動碾源源接濟現有川北道吳
文煌松茂道查禮督催趕運第查川省地方山路
崎嶇馱運維艱悉賴民夫背負每站需夫動以千

數此等夫役皆係各縣僱覓其彈壓撫綏必宜料理得當毋致伊等稍有失所別生事端方為妥協至日給工價若僅責令胥役人等完司支放更難保其不無尅扣必得派委幹員專司稽察方有責成現今兩司于通省中飛委幹練佐雜按站分派嚴飭實力巡查務令逐程速運並遴選丞倅監督站員散給口糧工價不得尅扣冒濫使小民均沾實惠仍派成都府知府蘇爾通阿雅州府知府江

權重慶府知府吳一嵩總理其事倘有不肖官吏
從中尅扣立即從重治罪至兵械內鎗砲最為便
捷而于攻打碉卡更為利器各營現存火藥十萬
九千餘觔鎗子五百二十八萬餘顆火繩六萬盤
業經陸續趕運其攻擊大砲阿爾泰現在軍營就
近製造尚恐火藥不敷應用 臣令兩司預為採買
硝磺上緊煎熬配合以供接濟如果事竣多餘仍
可分貯各營備用奏入

上嘉之

同日桂林又奏言小金川賊酋以內地土司敢于
築碉據險抗拒

天兵逆命之討法在必誅誠如

聖諭實非厚集兵力大壯軍威分路夾攻尅期深搗不
足以昭懲創而申

國紀今副將軍溫福已自永寧起程其派調兵丁均
于十月內外亦可到川查官兵人數衆多沿途安

頓必須派大員方足以資料理因詢之兩司已令知府李永祺先期督辦但由永寧入川至成都計十七站道路寫遠僅該府一人照應恐有顧此失彼之虞據臬司李世傑稟稱現欲前往接濟自應令其自永寧一帶率同府縣妥速經理今查黔省所調兵丁據稱帳房等件未經攜帶得飭承辦州縣趕緊製造一俟官兵到日即令帶往應用至官兵行走需用馬匹內地各站業經預備惟自雅州

以南由打箭爐至章谷俱係土司地方馬匹稀少
雖經調取建昌鎮屬馬三百匹恐站長途遠難免
貽誤因思成都滿營本有拴養馬匹此次調派出
師兵丁俱未騎往應即于滿營內挑馬八百匹解
赴打箭爐一帶備用接濟臣令藩司移會該協領
等速行選派解往至董天弼改由木坪一路曾否
進攻尚未得信但接應之員究不可少查建昌總
兵英泰松潘總兵福昌已在軍營尚有川北總兵

牛天昇重慶總兵和邦額未經調用該二鎮駐扎處皆係腹地現在並無需彈壓若董天弼已由木坪深入必須添兵繼進以壯聲威川北距木坪較近應令牛天昇即選本標壯健兵丁星赴木坪一路董天弼既有應援自可速收實效其和邦額有令馳赴省城俟各處兵丁到日沿途妥協照料奏入報

欽定四庫全書



平定兩金川方略

卷八

十九

平定兩金川方略卷八

欽定四庫全書

平定兩金川方略卷九

十一月丁酉溫福奏言臣於十月十八日行抵成都詢知桂林於十月十六日前往打箭爐至阿爾泰久駐章谷軍營董天弼已於九月初間即自西路卧龍關改由木坪一路目下攻勦情形無從詢悉臣正密加查勘適西南兩路及木坪各有差人回省臣親加細詢據南路材官劉彪稱打箭爐至

章谷四百五十里阿爾泰現在駐營其約咱去章谷二十餘里副都統鐵保總兵英泰副將宗元俊等領兵駐劄攻打章谷至約咱中間一河河水深溜所造木船每隻可渡四十五人阿爾泰約於十月十五日亦往約咱等語又據木坪差人金樑柱稱自雅州前抵木坪至堯磧一百二十里中間偏橋居多馬不能行董天弼現在木坪東關外安營副將靜海等在木坪西關外安營董天弼定於十

月十四五日由木坪進攻堯磧等語又據西路把
總趙憲武稱自汶川縣至卧龍關二百七十里署
遊擊蘇鳳麟於該處安營卧龍關至山神溝口七
十里總兵福昌於該處安營福昌近日在山神溝
口建碉一座防守路口八月十三日帶兵千餘進
攻巴朗拉奪得石卡三座上至山梁攻打碉樓因
連日大雨火繩淋濕鎗砲不能施放於十六日退
回鄧仍地方暫住十九日仍回山神溝等語臣查

阿爾泰董天弼於六月間一聞金川佔據革布什
咱小金川乘勢圍佔鄂克什之信即分西南兩路
用兵夾擊尚非失計而董天弼忽又改由木坪是
以明正侵地雖經克復而賊酋得悉率衆固守
約咱以拒我兵且西路官兵經董天弼帶往木坪
之外現在福昌處只留兵一千餘名分守各隘餘
兵無幾以致不能進攻臣思此事辦理之始所以
蕙從南路進兵者原因金川佔據革布什咱是以

就已到官兵於此進勒然道路迂遠本非進兵正
路臣察看情形當以西路為正兵且此一路原繫
從前征勦金川之地其小金川巢穴即繫各營駐
兵之所今南路自章谷進攻而西路自北直進取
其中堅前後夾攻使賊腹背受敵自不難於殄滅
董天弼舍此路而不攻改往木坪臣實不解其何
故至臣由滇省帶來滿兵二百名約於十一月初
十以內可以到齊黔兵三千名於十一月內外亦

可全到以臣愚見南路現集兵八九千名已不為少木坪一路雖再添兵亦屬無益查西路由汶川出口除山神溝巴朗拉之外自必尚有可進之路奮力夾攻似可得力再阿爾泰續調重慶正標兵五百名尚未過省今福昌現以兵單稟請添派臣即將此項兵丁撥往西路交與福昌協同現有之兵嚴加防守一俟由滇帶來滿漢官兵到日即由此一路竭力進攻但現當軍營緊要之時臣心實

為懸切擬乘此官兵未到之際同阿桂先赴章谷
查看彼地情形有與阿爾泰面商辦理者公同商
確約計官兵到日趨赴西路統領進剿似屬兩無
耽悞奏入

上諭曰所見已得要領佇俟捷音

同日溫福又奏言臣自入川境及抵成都以來悉
心體訪知兩金川之反側不靖狼狽為奸歷年已
久其設卡建碉侵窺隣境亦非一日久應嚴加懲

創始知畏懼惟因過年止顧目前無事徒藉口舌
彌縫及至事不容已又不能籌算全局期於一舉
殲擒因循既久轉使賊匪得肆鴟張毫無忌憚其
養癰成患情由即川省地方文武各官不能復諱
此時若不再將小金川殲滅不但金川無所儆畏
即通省各土司亦從此心懷觀望於邊計大有關
係今臣籌度地勢現在所調征兵惟南路為多此
路雖距賊巢較遠但兵丁已經前往若西路奮勇

攻勦則南路亦可乘機進取以分賊勢自不便將
南路現駐之兵復又分移西路且川省綠營兵額
共止二萬六千餘名業已調至一萬二千有餘川
兵向來柔脆今即再行添調恐亦不能得力臣現
帶貴州兵三千名又經密飭貴州預備二千名臣
先已附摺奏

聞俟奉到

硃批即飛調赴川徑往西路但此次進勦務在直搗巢

穴擒獲兇渠原非苟且嘗試所可了事今統計西路福昌現帶之兵及臣帶往之滿洲兵二百名黔兵三千名即續調二千為數亦僅七千該處在在堅礪且口隘甚多均須派兵分布所餘進勦兵力尚覺未為充裕惟是現調滿漢官兵計將陸續到川斷無坐待時日使賊人得以休息之理臣當先統現有之兵儘力攻勦倘揆度時勢尚須加添兵力查陝甘兵丁素稱強壯且與川省毗連似可調

用臣惟盡心竭力務將小金川掃滅無遺使金川從此不敢再萌故智方為一勞永逸奏入

上嘉之

溫福又奏言臣接桂林抄寄

奏摺內稱成都滿洲營內向有拴養馬匹請於此內挑馬八百匹解赴打箭爐一帶備用等語臣查從前征勦金川滿兵並不騎馬而此次滿兵二百名現擬於西路進征則打箭爐以外更無需馬之處

已令毋庸解送以省繁費奏入報

聞

上又諭軍機大臣曰辦理小金川一事總由阿爾泰董
天弼姑息了事並未早為籌辦將來辦理歲事阿爾
泰董天弼功罪自不容掩此時姑且無庸置議況董
天弼不過武夫非若阿爾泰以閣臣兼辦總督經理
不善者可比特其漸染綠營惡習專務虛誇實為可
恨伊現從堯磧一帶進攻若果自知奮勉勇往建績

未嘗不可抵蓋前愆設復觀望不前坐昧機要即於
軍營正法示衆亦其罪由自取必不能復為曲貸耳
至溫福以西路與賊巢最近欲於西路進攻自為扼
要之見但其形勢亦不可不為審度賊人所以拒守
巴朗拉者原因攻圍鄂克什遂於要隘設禁礮卡扼
我援兵賊既倚為負隅之勢且圖自衛其死守之必
固而番人之礮卡其料皆取於近地集衆合作不難
終日而成無論大砲轟擊未必能頃刻摧堅即幸藉

大砲之力攻擊一礮賊即乘其殘壘退而復築勢豈
能層層攻擊若於用砲之外令士卒輕冒矢石奮力
奪取倘或稍有挫損更覺不成事體看來小金川壤
地有限人戶無多除約咱及巴朗拉兩處外斷不能
分布抵禦此時南路既有重兵西路復添兵力聲勢
極盛僧格桑自必盡力守此兩路不暇他計朕意總
以為攻取要策必當避其礮卡越道而進使賊人失
其憑恃官兵得以乘間搗虛若能徑抵賊人巢穴擒

獲凶渠則兩路雖有堅碉不攻自破如此方為制勝之道況小金川叢爾蠻陬尤非緬地瘴癘可比而其人衆又俱資耕作為業更非能經久固持惟在各路急攻弗懈使賊首尾不能兼顧並遵朕昨降之旨設法招誘使其自相解體可望速奏膚功至此次進剿小金川必當一舉集事如兵尚不敷分撥即添撥陝甘官兵備用亦所宜然朕惟期於事有濟並不惜此添調之費現已諭令文綬密為選備二三千名兼為

籌辦軍械等項聽候調撥著傳諭溫福悉心籌辦如
果尚須添兵若干即飛咨文綬如數派發將併傳諭
桂林知之

上諭軍機大臣曰溫福已於十月十八日至成都即馳
赴章谷相度情形與阿爾泰面商進剿從前阿爾泰
遲悞機宜其咎實無可貸今溫福已至軍營惟當實
力協同經理所有兵糧軍器等項繫督臣專責阿爾
泰固無可旁諉况溫福親往西路則南路進兵仍繫

阿爾泰之事務當奮勉自勵相機攻勦以期稍贖前愆若再因循觀望或更與溫福稍存畛域猜嫌之見則是自速罪戾矣至董天弼前赴木坪一路往返紆迴已屬玩日悞事今進攻達木巴宗若能迅搗賊巢尚可功罪相抵倘仍遷延不進坐昧機宜軍法具在董天弼又何必欲身為嘗試乎將此一併傳諭知之已亥阿爾泰奏言近日攻打約咱大碉賊番添兵固守臣飭令將領添布兵練日夜圍攻凡見賊番往

來即用排鎗擊打其藏匿碉內者用砲攻擊務期設法破碉殺賊搶佔險要以圖進取至西路山神溝從前由間道密進之處已被賊番知覺於各要隘更加防備臣曾囑福昌嚴密固守如提臣由堯殲攻至達木巴宗賊番勢難兼顧福昌即可乘機由巴朗拉進攻至董天弼於九月三十日已抵木坪官兵陸續齊集日內即可前進又奏言臣欽奉

上諭將宗元俊換給副將頂帶其土目土兵分別犒賞

銀兩無不歡感奮興各思勉力現在一面用新鑄大
砲擊其堅礮一面於各隘卡分布兵練如大兵攻破
其礮賊番奔潰我兵即可奮力截殺奏入

上諭軍機大臣曰阿爾泰今日奏到各摺不過覆奏節
次所奉諭旨而於攻勦事宜毫無籌措不知在彼所
辦何事即如約咱一路阿爾泰九月十八日摺內已
稱現在進攻距此次奏摺已閱三十餘日豈有聚集
多兵攻圍經月不能得一礮卡之理至所稱現用新

鑄大砲擊其堅礮究於何日施放並是否能得轟摧之益亦未叙明又所稱凡見賊番往來即用排鎗擊打所辦更未為周到官兵既合力攻圍豈可復容賊衆出入且此來往賊番必為守礮之賊運送水米阿爾泰等即未能迅破其礮而以現有之七八千兵練分派堵截斷其餽運之路並非難事且係此時緊要機宜如果能嚴圍密禦阻絕賊衆應援雖有堅礮亦難持久阿爾泰即未嫻軍旅而以常情揆度事理尚

其思計所能及阿爾泰何總不肯稍盡心力甘於株
守無策乎今溫福桂林俱至軍營着將以上各情節
交伊等查明據實奏覆

甲辰阿爾奏言查小金川因官兵連次克捷遂
踞約咱要隘地方悉力固守臣現在軍營鑄成三
千觔重大銅砲一位食藥十一二觔配用生硃砲
子重二十觔二十三日用以擊其堅礮聲震如雷
日擊礮尖埧卸兵丁勇氣加倍從此儘力轟擊一

得險要即可與董天弼併力夾擊力圖勦滅又奏
言臣前在約咱軍營因見尋常砲位不甚得力是
以趕鑄大砲近日鑄成日逐轟打以大砲之力原
能打透礮牆第賊於礮內藏匿砲勢一過旋即
內填補今復用靖遠劈山等砲遂同大砲一齊併
發使賊番不及補苴且賊礮受砲之處既多被擊
之時復久修築雖堅必歸傾塌並選勇壯官弁兵
練埋伏於我礮之下稍有傾塌可乘即便奮勇往

奪奏八

上諭軍機大臣曰據阿爾泰奏約咱一路奮力進攻而
溫福又赴西路巴朗拉攻賊要害並據奏董天弼攻
克甲金達山梁即可奮力進取是此番三路分進賊
人首尾不能相顧可望剋期集事至前曾降旨令阿
爾泰等曉諭守碉賊衆設法招降如果辦理得宜自
為有益但受降如受敵臨時最宜審慎如賊碉內無
名番衆自懼來投降可隨時招納以散其黨即頭目

中或有來投者亦不妨受而撫之但不宜留於營中
及用為嚮導至僧格桑聞有招降之信或因事勢窮
感姑求免禍或心懷叵測譎計投誠毋論是真是偽
總不宜輕信惟當令其自來就勢擒執行軍使詐原
屬無碍并須令素識逆酋之人詳悉辨認勿令以李
代桃斷不可踈於料敵託名開誠布公率往受降以
致墮其狡計蓋僧格桑見從前金川曾以受降完局
意謂中朝大臣乞降即可無事或且從中暗施鬼域

伎倆阿爾泰當知前此辦理金川之時原屬因時制宜可一不可再小金川係內地土司更非金川可比乃敢違背教約抗拒官兵罪在不赦斷不能援金川往事為例朕因受降一節甚有關繫偶爾計及因為詳悉傳諭至軍營一應機宜遠在六七千里以外難以概為遙定惟在阿爾泰等臨時酌量即溫福雖曾諳習軍務亦務須慎重籌備相機妥辦

臣等謹按行軍機要必當籌意外之虞先為防

範況番人如鬼如蜮丐命乞降豈可據以為信
我

皇上於受降如受敵之語層見疊出用以提策戎行俾
知謹慎厥後小金川戡後軍中視降番如孤豚
腐鼠不知防檢賊人從此潛相勾結遂致成功
盡棄重勞收復乃兩載以前

聖明即已鑒及於此仰見

如神之照事無久近總範圍而莫能過也

乙巳溫福奏言臣於十月二十七日行抵清溪縣
地方接據雅州府知府江權稟稱探得提督進兵
於二十四日攻破甲金達賊寨四散並聞牛廠已
得不日直入達木巴宗等語臣詳加體察細閱輿
圖查阿爾泰所駐章谷軍營在小金川巢穴美諾
之南相距本遠然所攻約咱已屬小金川之地不
可無兵以分賊勢至董天弼所進堯磧一路在美
諾之東現在攻破之甲金達及將到之達木巴宗

則繫賊匪佔據之鄂克什地方查達木巴宗之北如巴朗拉一帶賊亦多建碉卡而福昌一路官兵又力量單弱是以未能即進今董天弼果能直抵達木巴宗則福昌等一路乘勢進攻不惟可與董天弼會合且從此直搗美諾勢較便捷況董天弼既經深入其情形又與前不同自當添兵接續則聲勢倍盛而攻勦更為得力臣思阿爾泰處業有兵七八千名而續調成都滿兵一千名內亦撥往

六百名足敷進勦之用現在可以調往木坪者只
有成都滿兵四百名甫抵雅州雅州距木坪堯磧
不遠因將此項官兵令其前往堯磧速赴董天弼
軍營協同進勦自更有益至西路巴朗拉一帶雖
賊防守甚嚴然督率勁兵竭力夾擊諒此么膺小
醜必不能首尾相顧況阿爾泰軍營現有桂林前
往協同辦理其餘軍務原可彼此扎商臣不敢拘
泥前奏仍往章谷轉致稽遲查五岱於二十四日

率領頭起滿兵五十名已抵成都計數日內滿兵
二百名俱可到齊臣令迅速料理起程並飭馬彪
帶領黔兵趲行前進一面令福昌等預備攻勦臣
率領已到官兵前往西路進攻如此併力齊進庶
為迅便奏入

上嘉之

同日溫福又奏言臣准貴州巡撫李湖提督拜陵
阿節次扎咨以此次調赴四川之黔兵三千名時

值冬令需衣禦寒議定每名折給棉袍等銀二兩
再備鞋襪等件分營製造於兵過寧夏時散給所
需銀兩於通省官兵俸餉內扣還歸款第川省口
外現值隆冬禦寒尚須加厚前銀若不敷用或須
再為酌增應請將加給若干就近移明四川司餉
衙門撥項借給移知黔省照數解還等語臣查此
項黔兵三千原係秋間調往永昌該處氣候炎熱
兵丁只有隨身單夾衣服今調撥征勦小金川由

汶川出口後天氣寒冷迥非內地可比且現在四川所調本省征兵每兵除棉襖棉褲外尚備有皮掛皮帽今黔省兵丁除棉袍已由該省置備其皮掛皮帽在所必需臣當即傳督標中軍副將飭令加緊備辦俟黔兵陸續到省即交與領兵鎮將等按名分給應用價銀三千九百餘兩即照黔省來咨行知川省軍需局動支墊辦仍行文黔省照依原議於各官兵俸餉內扣還還項奏入

上諭曰此項即着賞給不必扣還

戊申溫福奏言臣在清溪地方聞董天弼進兵甲
金達之信隨即星赴前路茲於十一月初二日已
抵成都滿兵亦陸續到齊五岱帶頭二起兵一百
名於初二日起程其三四起兵一百名臣飭令迅
速料理交副都統莽堪察等帶領於初四五兩日
全數啓行惟是西路福昌處僅存兵一千七百餘
名而自滇來川之黔兵雖據馬彪稟稱晝夜趨行

但綠營本無馬匹亦儘力行走亦須十一月内外
方到成都西路兵力尚為單薄但目下事關緊要
正當三路併力夾擊之時更不可稍待時日致失
機宜臣思黔兵既難久待而附近又無可調之兵
惟有前調川北標兵三百名該鎮牛天畀帶兵甫
抵省城臣即將此項兵三百就近撥付西路即令
總兵和邦額順便帶領其牛天畀原繫桂林帶往
木坪之人今木坪一路綠營大員只有董天弼一人

應令牛天昇仍赴木坪幫同董天弼協同攻勦臣
一面自成都起程直赴軍營將福昌軍營所有官
兵逐一查明可用若干預為部署自滿兵及川北
鎮兵齊到督率進攻奏入

上嘉之

庚戌董天弼奏言甲金達距堯磧八十餘里其甲
金達對面山梁小金川於要口修有碉房二座臣
於二十三日自堯磧起程帶領將弁漢土兵練於

二十四日併力上山攻擊立斃賊番十數人其餘皆退入碉房堅守不出連日用砲攻打未能即破臣看山梁北下繫鄂克什牛廠即小金川來路二十七日臣分兵繞道潛往殄戮據守牛廠賊番二十餘人又將牛廠據住至二十八日半夜賊番直撲營盤官兵俱有準備施放鎗砲賊番退走割取首級耳記等件至二十九日牛廠東北尚有橫亘山岡賊番在上添修卡座隨又分路上攻立時佔


據至十一月初一日即從所佔山梁向上攻擊賊
番驚潰而逃所有木坪鄂克什及小金川三土司
交界要隘已全攻獲凡有偏僻捷徑通小金川者
亦均撥兵防守臣自此向西北進兵一至本布爾
桑岡即距美諾巢穴不遠而由東北四十餘里可
直救達木巴宗今郭克什土司色達克拉之弟雅
滿塔爾自達木巴宗突出稟稱連日聞鎗砲聲知
是救兵已至甲金達專候速進以便內外夾攻等

語臣竊思達木巴宗待救甚急且相離較近若將
圍困達木巴宗賊兵先已擊破則已出巴朗拉之
後俟副將軍溫福迅赴西路兩面夾攻至巴朗拉
道通則小金川進兵之地又不止於本布爾桑岡
一處臣當會同溫福妥商辦理分路進兵以速期
勦滅奏入

上諭軍機大臣曰據董天弼奏攻得甲金達山梁並佔
據牛廠所辦稍有起色其地既去達木巴宗不遠董

天弼自當乘此勝兵進攻達木巴宗以扼巴朗拉之
後路且色達克拉之弟既能逸出則達木巴宗聲息
已通內外夾擊施功尤易據董天弼奏稱攻取牛廠
繞道前往可以邀截而得可見攻勦要策必當避其
堅礪尋覓間道始為事半功倍至僧格桑敢於圍困
鄂克什抗拒官兵情罪實難輕宥設逆酋因我兵全
力進攻勢難支禦窮蹙乞降斷不可許節次所諭降
旨甚明阿爾泰溫福務須遵朕前旨分路夾攻直搗

巢穴擒獲逆豎分定其地切勿稍存姑息遷就完事



平定兩金川方畧卷九

欽定四庫全書

史部

平定兩金川方略卷

十二

員外郎_臣顧宗泰覆勘

總校官原任侍講_臣王燕緒

欽定四庫全書

平定兩金川方略卷十

十一月辛亥阿爾泰奏言臣現駐約咱悉力進攻
惟查僧格桑與素諾木狼狽為奸久在

聖明洞鑒而小金川與金川接界之處甚多如攻克小
金川地方自當隨處設兵堵截然恐尚有一時不
及遲制者至僧格桑勢處窮迫難保其不竄附金
川倘索諾木敢于藏匿即當遵

旨嚴切曉諭務令擒獻免渠以期竣事又奏言約咱山
勢綿亘中隔大溝賊番於溝口設有石卡五座與
大碕相近互為防禦臣督率官兵將石卡五座全
行攻克其拒敵之賊及救援之番除傷斃外割取
首級六顆生擒一名現在研訊賊營情形相機攻
取奏入均報

聞

同日桂林奏言現在大兵進攻約咱將及兩月尚

未克捷臣馳赴軍營經過各土司地方細加察訪
所見茂紐等處山隘橋梁俱有屯兵防卡詢稱山
前屬明正土司之地山後即屬金川所佔革布什
咱之地現在辦理小金川恐索諾木幫兵助逆襲
我後路是以奉調防守其自章谷至納頂一帶新
得之仲濃等寨碉卡甚多與約咱山勢毘連臣親
至駐兵處所將新鑄大砲演放并查看賊寨形勢
詢問宋元俊據稱賊番狡惡日則全伏溝中夜則

潛入拒守即有大砲攻擊而石礮不能驟塌是以
尚未攻克至現在兵練雖有八千餘名除分防甲
木楚河口及章谷等九處要隘並新得河東扎功
拉等礮卡共二千九百餘名外其西山梁及雪山
等各卡隘暨噶中三處地方共三千二百餘名現
在攻擊之漢土官兵僅有一千九百餘名每得一
處即須防守兵數恐不敷用再此處相近地方別
無間道惟汗牛一路距約咱一百六七十尚可

進兵而道途窄隘兼之目下兵力不能再分若得
多調官兵分路並進小金川番衆分撥不敷糧食
不給自可即時殄滅等語

臣初蒙

恩命軍旅重情何敢稍涉孟浪但止此用砲相持徒為
坐待之策必至老師糜餉有損軍威

臣

現今宋元

俊等駕馭巴旺布拉克底土兵尙能越嶺壓山攻

破約咱我兵又據小金川險要門戶即可將河東

扎功拉暨西山梁等處防兵酌量移撤并將所調

成都滿兵一千名陸續到來以資調遣向後得地
既多駐兵不可不備果有不敷副將軍溫福將次
可到容臣會同悉心詳議再行具奏

上諭軍機大臣曰據桂林奏攻勦約咱情形未免過於
遲緩桂林既至該處當同阿爾泰速籌勦擊之策督
催進兵與溫福董天弼三面合擊使逆酋首尾不能
相顧庶可尅期集事至桂林以越嶺踰山專責土兵
殊屬非是土兵雖較習地利亦須官兵酌配同行方

為合理此等土兵並非額食官糧之人第因其原係內地土司所屬用兵時派令出力固未為不可但我綠營兵衆平日坐糜糧餉及遇越山勦賊之事輒存畏縮專以屬之土兵致令勞逸不均於情理既未平允且國家豢養若輩有事不能得其實濟則常時之設營教養又復何為即伊等坐視土兵成功自甘無用亦寧不稍知愧慙况土境有事仍藉土兵收勦官兵幾同虛設又豈不為其所輕此於邊務番情甚有

關係顧可專用以克敵制勝不為熟思妥計乎至宋
元俊前此收復明正土司侵地及攻克仲濃等處頗
為奮勉是以加恩由遊擊特擢副將乃自抵約咱以
來不知感激勵勇安坐不前此乃綠營庸劣惡習甚
屬不堪阿爾泰等當諭宋元俊痛自改悔毋自貽戚
又桂林摺內稱向後得地既多駐兵不可不備等語
尚未合行軍要領現在我兵尚未深入所得明正侵
地宜防賊匪來爭自不得不駐兵防守若既已得其

要害度賊匪不能於他道越過止須於扼要處所駐
兵以斷其來路此外更無庸顧慮若得一賊境即添
駐一路之兵無論兵力愈分愈單不敷奮擊之用且
安得如許士卒分派防守從前平定準部回部時我
兵乘勝深入並未瑣屑措置若此溫福深知其詳阿
爾泰桂林等無難扎詢也再所稱茂紐等處山隘現
在駐兵防卡山後即係金川所佔革布什咱地界等
語我兵齊集合勦自可計日攻破賊巢擒殲逆豎若

索諾木見小金川已破心知畏懼斂迹退歸或詣軍營謝罪原可宥其既往不必復加窮究止須查辦革布什咱勾通構釁之人重加治罪於被戕之土司後裔慎選繼立撫定其地則革布什咱之事亦可完畢若索諾木於勦定小金川後仍然罔知忌憚屯聚不退即當以我勝兵全力勦擊金川亦屬一勞永逸之計阿爾泰溫福等當深體朕意隨機酌辦以靖邊徼

同日桂林又奏言

臣

由省起程沿途體察情形惟

自清溪以南至打箭爐等處運送軍糧藥彈間有

堆積

臣

即傳詢承辦各員據稱背夫運脚銀兩俱

係先行墊辦目下設法催夫斷不敢悞等語

臣思

軍糧等項最關緊要今司庫既未撥給銀兩是各

官雖有承辦之名並無經費之項稍有遲延均堪

藉口詢之建昌道白瀛亦稱屢請動帑尚未見覆

等語

臣

與該道等細加籌度各站距省瀉遠若必

俟司庫撥給銀兩未免緩不及事今打箭爐同知

庫貯尚有銀二萬餘兩於此項內暫支銀八千兩
分發附近各站一俟司庫銀兩撥到即行歸款則
辦理有資軍糧可以無悞奏入

上嘉之

同日桂林阿爾泰奏言現在派調本省及自滇來
之滿漢官兵分路進攻所有軍需各項用費浩繁
臣桂林抵成都時詢之藩司李本據稱川省地丁
正項并鹽茶耗羨各款每年各有支銷所餘無幾

止有備貯銀一百五萬兩原因川省地處邊陲存
為緩急之需遇有要事例得借支等語今臣桂林
與阿爾泰公同商酌副將軍溫福業已到川分路
前進鹽糧夫馬等項勢在急需所有存貯銀兩現
據李本詳稱已支用三十七萬七千餘兩庫存僅
六十七萬餘兩臣等通盤籌畫恐將來不敷應用
仰懇

勅令近川省分酌撥銀三百萬兩迅速解往以備接濟

統俟事竣核實報銷奏入

上勅部速議具奏次日戶部奏言現在進勦賊酋餉銀
自宜充裕應准其在鄰近省分撥解以濟急需

臣

等請於湖北湖南各撥三十萬兩廣東撥六十萬
兩又於廣東鹽課內撥六十萬兩並於廣西撥一
百二十萬兩以上共撥銀三百萬兩令各督撫派
委幹員迅速解往

上從之

丙辰桂林奏言查進勦小金川現有三路一從瓦
寺之巴朗拉直入小金川咽喉是為大路次從甲
金達救援達木巴宗而趨美諾攻擣小金川腹心
是為中路再次則遶小金川尾閭由約咱進攻僧
格宗是為末路此一路自打箭爐以至約咱經過
茂紐等處俱與金川所佔革布什咱地界相連山
叢地雜防範宜周自不應由此而進臣細加察訪
始知阿爾泰原因籌辦革布什咱一案駐劄打箭

爐又值小金川潛行肆逆攻圍鄂克什並奪取明正地方遂飭宋元俊等統兵前進宋元俊帶領現有之兵並駕馭巴旺布拉克底收復明正之納頂邊谷等處阿爾泰並未通籌全局即思由此進取繼而宋元俊統馭兵練鼓勇渡河克復明正地方并克小金川扎功拉等寨所得碉卡均須留兵防守及至約咱兵力既分遂難深入此其所以株守約咱也嗣宋元俊屢以添兵為請又復游移中止今

聞董天弼已克甲金達山梁副將軍溫福復以機
不可失帶兵改赴西路兩處悉銳以搗賊巢而阿
爾泰此時支絀屢見勢不得不議請添兵誠為迂
緩但該酋等之狼狽為奸久經

聖明燭照設金川或阻我歸途或斷我糧道

國體所在關係非輕若竟自撤兵改途進發已復之
地又為金川所有更復成何事體是約咱本屬無
足重輕之地致成最關緊要之區臣再四籌度必

須大增兵力分防各隘並派撥兵練訪覓間道直趨美諾襲取賊巢現在仍督將領相機進攻與木坪巴朗拉兩路遙為聲應俾賊首首尾不能相顧以期迅奏膚功

同日阿爾泰奏言查明正土司地方與金川所佔革布什咱地方連界處所甚多自喀勒塔爾以至茂紐東谷剛察章谷一帶約三四日之程均係現在進攻約咱之後路據布拉克底差人密告宋元

俊言小金川屢次求索諾木發兵阻截大兵糧道
宋元俊措詞譯諭以安其心索諾木始將調集土
兵撤去又小金川防所屬番民投順內地將各路
賊番調換守卡使有室家可戀並於約咱碉內刨
挖地窖碉外刨挖土濠皆如金川當日之故智臣
南路漢土兵練雖有八千八百餘名但此內派赴
各糧站山梁碉卡防禦外進攻約咱之兵不過二
千實不敷用且喀勒塔爾等處界連革布什咱防

兵尚覺單弱可虞蓋索諾木此時雖未敢遽為妄動但或慮及唇亡齒寒且為小金川勾結萬一絕我糧道關係匪輕不可不嚴為防範計南路喀勒塔爾茂紐章谷一帶須添兵五千名始足以壯聲勢並可消阻索諾木之異志約咱軍營須添兵三千名方足以迅速攻取仰懇

皇上於附近川省之貴州陝西湖廣等處共撥兵八千名選派勇幹將領連帶來川

臣

仍令川省各營招

募新兵數千名隨時分撥應用自可一勞永逸均
奏入

上諭內閣曰阿爾泰辦理小金川之事養癰玩寇漸成
大事自五月內即往打箭爐駐兵三月有餘株守不
動及接朕節次促令進兵之旨始行拮据籌畫調兵
造船渡河為攻擊之計以致賊番得以從容設礮支
禦是官兵之未能迅速進攻皆由阿爾泰貽誤朕復
促令督兵直進移至章谷旋次約咱到約咱後又已

匝月仍然按兵不進及聞溫福將到始趕鑄大砲計
圖掩其遲延之跡其心更不可問朕屢加開導不啻
十餘次冀其痛自猛省以收桑榆之效初不料其執
迷不悟一至於此總督統理全省軍務於邊陲要地
撫馭諸番尤其專責況阿爾泰係滿洲大學士當以
國事為重乃竟漠然不以為念惟圖掩飾偷安直至
此日始請添兵攻勦意存諉卸若他人如此負恩貽
悞即當按軍法從事朕尚念阿爾泰平時辦事之誠

暫從寬典阿爾泰著革去大學士總督留於軍營辦理一切軍需糧餉等事効力贖罪若再稍有遲悞即於軍營正法示衆伊在川日久地方情形皆所熟悉一應大小文武皆其舊屬斷不致因其罷職呼應不靈若果有抗違不從阿爾泰原不妨據實叅奏即將違悞之人重治其罪溫福著加恩補授大學士所有四川總督員缺即著桂林補授將此通諭中外知之

同日桂林阿爾泰奏言賊境四面環山凡遇險仄之處多於山頂設礮雖有可繞之路賊番踞在高處易於瞭望若繞過其地則守卡賊兵即在我兵之後惟恐阻我糧運勢不得不層次而進至於撲礮一事臣亦知從前率多失利是以鑄造大礮使我之礮力可以遠及賊礮而賊之鎗礮不能傷及我兵昨獲石卡五座皆係先用大礮攻擊度量礮內受傷者多賊番難以抵禦始行上前撲攻至向

來招致番衆俱不肯降臣等體察其故蓋由僧格桑將西面所住番民用之東面使有室家可戀以致不敢輕棄投降今臣等復欽遵

諭旨飭知該番等身命不保何能顧及室家如能投順內地俟擒獲僧格桑削平其地將各番所有室家田地賞給本番仍可完聚且免一切糧差更得安享太平之樂臣等仍一面加緊攻擊使賊番損傷者多彼知固守必死投出得生諒當去逆効順漸

成解體奏入報

聞

同日溫福奏言

臣

於十一月初七日自汶川縣出

口行至草坡即係瓦寺地方據該土司桑朗因春

率領大小頭人遠出迎接

臣

察該土司雖老人尚

明白言語應對實屬小心恭謹當即諭以此次進

勦小金川原為僧格桑克頑不法徼外諸番被其

欺凌特

命本將軍統兵勦滅俾爾衆土司長享太平爾地方本
小且續到大兵俱必經由爾境本將軍不忍再調
爾兵爾當傳知各頭人分派兵練自行堵截隘口
就是爾等出力報効之處該土司叩頭祇聽察其
詞色歡悅之中深知敬畏該土司等又稱我瓦寺
一帶地方均係崇山峭嶺此去路徑益為險仄加
以時當冬令冰雪堅凝雖下馬步行亦難措足我
等當撥夫前往將山路冰雪砍出階級庶可前進

等語當派頭目二名番衆五十餘人前往修理

臣

分別賞賚於初八日即由草坡至根達橋中經天赦山一座上下各數十里山勢本屬峻險而道路皆在山陰為日色所不到是以冰雪凍結陡滑難行又初九日由根達橋至碩塘中經納瓦山一座其險峭凍滑亦與天赦山相似

臣

等下馬步行用言勉勵官兵俱踴躍爭先所經兩山俱不數時全行過竣一無落後者奏入

上諭內閣曰溫福奏經過瓦寺地方該土司等撥夫修
道小心恭謹等語各土司所屬土兵番衆有隨營攻
勦及修路運糧踴躍奮勉者自當量為獎勵俟成功
再予加恩著溫福會同該督桂林查明出力各土司
作何酌賞之處即行妥議奏聞候朕降諭旨以示鼓
勵

丁巳阿爾泰奏言自打箭爐以至章谷相距雖僅
四百餘里其間道路險仄人馬難以過行而中間

大砲山一座四時積雪臣經過之時雪深三四尺以致六日始到至維州協千總韓世貴前准董天弼札知在德爾密打仗迷失未出茲據福昌稟報小金川將韓世貴送出除札致提臣查明韓世貴因何到小金川地方是否打仗被掠小金川因何送出各情由另行酌辦奏入報

聞

上諭軍機大臣曰川省現有之兵不敷分派昨已有旨

令陝甘貴州督撫迅行調派赴川計川省再得此五
千兵力更厚逆酋見官兵聲勢既盛統兵大臣又不
似前此因循必懼而乞降但僧格桑頑梗逆命情罪
實為可惡斷不可允其所請逆酋若至軍營求告即
當就勢擒拏選派侍衛及文武幹員解送京師盡法
處治所謂兵不厭詐斷不可拘拘於撫夷小信及不
殺降人之常說以至悞事溫福等當務其大者遵旨
而行又阿爾泰奏董天弼在德爾密失迷之千總韓

世貴經小金川送出等語此即逆酋詭譎預為將來求降地步更不宜為其所惑韓世貴因何留於小金川及小金川逆酋如何將伊送出之故必詳細詢問分別辦理溫福桂林兩路不拘何處於該千總解到時即行查明具奏仍著派員伴送來京至於不許僧格桑求降之意亦不宜預為宣露若逆酋知其罪在不赦及至勢窮力蹙竄入金川則其事仍不能了或僧格桑逃往金川即當曉諭索諾木勒取如彼即將

逆酋獻出而又退還所奪革布什咱之地亦可無庸
再辦若金川敢萌負隅之見抗不遵命是索諾木即
係叛黨必不可顛顛了事但金川地勢險隘較之辦
理小金川更須厚集兵力恐現在所增陝黔兩處之
兵仍屬不敷而近省湖廣之兵又不甚適用如將來
必須征勦金川莫若再於健銳火器各營內揀派二千
餘名前往川省可抵綠營數萬人之力於事自為有
濟著傳諭溫福桂林預為籌畫據實奏聞以便及早

選發尅日奏功

同日溫福奏言

臣

於初十日抵卧龍關總兵福昌

先已帶兵一千七百餘名進駐鄧仍計距卧龍關

一百餘里

臣

一日即可趕至該鎮營盤查福昌前

因兵力單弱未能前進所以巴朗拉賊匪實在情

形未能深悉俟

臣

抵彼時探聽賊情審度地勢覓

路進剿至由滇赴川之黔兵三千名今日據報頭

起於十月二十八日行抵威寧地方計抵軍營須

在十一月盡十二月初臣現帶滿漢官兵五百餘

名加以福昌處所有兵一千七百餘名共二千二

百餘名兵力實未為充裕臣抵山神溝鄧仍筆處

察看事機如果刻難少待即就現有之兵奮力前

進倘不得不稍集兵力則俟黔兵三千名到齊併

力進攻似此三路會勦不但鄂克什地方可全克

捷而小金川逆酋亦斷不能稍稽殲戮萬一賊人

死守窟穴尚藉添兵臨時酌量情形謹遵

諭旨一面飛調黔省續派之二千名並文綬選備之陝
甘兵二三千名務在掃穴擒渠一舉集事奏入
上諭曰所見俱合機宜矧佚捷音

戊午文綬奏言

臣 欽奉

上諭遵將調兵選將及籌脩軍械馬匹沿途供支糧料
各事宜分析籌辦一固原西寧鎮標協營及西安
提標協營素稱勁旅且與川省相近請於固原各
屬選兵一千名西寧各屬選兵一千名西安提標

各屬選兵一千名密咨各該提鎮挑選准備帳房
軍械等項俟川省咨文到日即刻起程一領兵將
官必須熟練軍旅曾經戰陣之人方於統率有益

臣查延綏鎮總兵書明阿熟悉營伍曾在西路出

兵明白奮勇可當統領之任再向例每兵一千名
需用將備二員選帶本營千總外委十餘員今查
河洲協副將色倫泰甘標遊擊馬正國督標都司
辛大用固原守備靳陞均屬曾經打仗頗為奮勇

堪勝帶兵進勦應請將總兵一員作為統領副遊
都守四員作為領兵之官俱令密行整備俟川省
咨文到日將固原西寧兵二千名分領進征其陝
省領兵將官臣已咨商西安提督汪騰龍遴選酌
調並交書明阿一併統領一官兵起程例給俸賞
行裝銀兩但此時密籌預備不便先行支給應俟
川省咨調到日即於所屬不拘何項銀兩先行墊
發隨後赴司領回歸款至馬匹最關緊要其征兵

撥缺馬匹即令照例隨時買補沿途所經之處借
支口糧料草等事亦俱先期密備奏入

上嘉之

平定兩金川方略卷十

欽定四庫全書

平定兩金川方略卷十一

十一月庚申

上諭軍機大臣曰現在進剿小金川總以速擒逆酋為最要蓋僧格桑之敢於抗拒恃與索諾木狼狽為奸若僧格桑就擒不但小金川可以永除後患即索諾木亦必聞風畏懼其事更易於完結設或僧格桑見我兵勢盛自度力不能支逃入金川藏匿自不得不



向其勒索若金川即將逆酋獻出並將所佔之革布
什咱退還原可置之不究倘索諾木頑梗負固敢與
小金川黨惡抗不擒獻其勢斷難歇手小金川乃內
地土司豈容其抗命逋誅即金川亦曾受土司印信
非如從前阿睦爾撒納舍楞之逃入俄羅斯可比若
竟釋而弗問何以震懾番衆綏靖邊陲朕非喜於用
兵乃溫福等在軍機處所深知者且現在西北諸部
蒙古回人盡為臣僕幅幘既廣豈肯於叢爾蠻貊復

輕黷武第萬一兩金川勾結竄匿稽誅則金川即屬
叛黨勢不得不移兵申討又豈可因其地險畏難中
止乎昨據阿爾泰奏有宋元俊探知小金川差人求
金川發兵阻截大兵糧道經宋元俊譯諭索諾木不
敢幫助小金川之語雖不足信但其外貌尚不敢顯
然抗違溫福等當酌量機宜或有應檄諭索諾木不
使結連滋蔓之處不妨令宋元俊設法開誠曉諭俾
其遵奉教約但須察索諾木果出誠心方可宥其已

往倘或賊情詭詐暫時面從為緩兵之計則斷不宜
于輕許蓋兩金川之敢於抗違實由阿爾泰等連年
姑息因循致逆首毫無忌憚即前次辦理金川之事
亦不過將就完局未能大示創懲而索諾木僧格桑
又皆頑稚無知不能如郎卡之畏威知罪自不可不
加之整飭若復如當年辦理金川之曲示包容或我
兵甫退賊衆復屯無論往來勦擊徒涉煩勞且復成
何事體至所云小金川欲求金川發兵阻扼大兵歸

路之處諒不至如勒烏圍噶拉依之險賊能來我亦
能往當於何路派兵直入或可直搗賊巢易於攻取
溫福等應留心措置以收扼要之益再山川形勢乃
行軍先務前諭阿爾泰等繪圖呈進已經兩月有餘
尚未奏到溫福桂林務即速為辦妥進呈庶可悉其
地理至將來若尚須征剿金川則現兵續調者恐不
敷用溫福等如亟須添兵備用速行奏請選派京兵
前往既已用兵即不當惜費朕於軍旅大事從不少

靳況兵多而速於成功較之兵少而老師糜餉其相
去更不可同日語也今阿爾泰已經罷斥此事專屬
之溫福桂林伊二人當實心任事勉力為之尅期奏
績以副恩眷

同日

上又諭軍機大臣曰前董天弼奏十月二十四日已攻
得甲金達山梁並得牛廠等處可以直取遠木巴宗
據稱其地去美諾不遠何至多延時日而鄂克什土

司之弟又從達木巴宗逸出稟俟援兵一到即內外夾攻立功尤易因何復有阻滯不即趨赴達木巴宗殊不可解著傳諭董天弼即將現在攻剿情形若何迅速覆奏仍一面督率兵衆奮勇進攻如其直搗賊巢擒渠定地自當量功優叙若稍有觀望畏阻其取罪亦不小昨因阿爾泰因循玩悞已降旨革退留於軍營効力董天弼前亦屢經貽悞罪無可辭朕曲為寬宥特以伊現在帶兵尚屬稍知出力姑暫緩其處

分以勵後效董天弼身係武臣若稍有違悞即當以軍法從事不能如阿爾泰之僅予罷斥也

辛酉溫福奏言

臣欽奉

諭旨查阿爾泰處帶兵八千餘名由章谷進剿該處雖距小金川賊巢紆遠然係兩金川接壤之地既可攻擊小金川更可使金川心懷顧忌不敢顯然助惡是此路官兵亦不可少惟是約咱攻圍經月未能進取情形臣實未能深悉其提督董天弼于十

月二十四日率兵往甲金達攻打二十七日佔據
牛廠十一月初一日甲金達山賊人棄礮遁去官
兵現距達木巴宗四十餘里臣昨又聞該提督于
十一月初七日分兵兩路攻奪賊人所建木城未
及佔據山梁被賊衝下官兵受傷及迷失者甚多
且有遺失鎗砲之事臣現在飛札查明再行確核
具

奏至總兵福昌雖報稱進至鄧仍其實距山神溝僅

數十里不過虛詞塞責今營內現存兵一千七百
餘名經連次挫衄之後兵氣頹懦已極且董天弼
前往木坪之時凡有將就可用者俱行挑往所存
者多係受傷患病之人是該鎮福昌前次之進征
失挫及後此之株守無能並於一切行軍要務漫
無措置實屬咎無可諉而以目下情事而論兵力
如此疲弱又當山路陡險冰雪凝結之時該鎮之
不能速行進取亦屬實情

臣以此地所留將備非

衰老患病即庸懦無能一時不得領兵之人是以
暫令該鎮管領原兵以觀後效仍隨時密為存記
俟將來核定奏明請

旨查福昌處所存之兵既不足恃惟截留川北鎮兵三
百名重慶鎮兵五百名未經挫失尚可鼓勵前進
其滿兵二百名均已到齊又於福昌兵內量挑一
千餘名臣揆度目下事機董天弼一路雖未必能
直抵達木巴宗而正當用力功勦之時西路進攻

自屬刻不容緩即已朗拉一帶賊人多建碉卡臣
與五岱等商定探取小路繞出其後相機辦理又
奏言本月十三日據總兵福昌報稱已朗拉坐卡
官兵拏住小金川番人七名押送軍營訊問並將
該番所帶番稟呈送前來譯係小金川土司澤旺
及僧格桑投送都司馬詔蛟之稟臣查僧格桑生
性詭詐所具番稟既已支離狡譎又以伊父澤旺
尚存故為同列銜名希冀稍緩大兵進討其藉詞

支飾之處自不值復加飭諭但查澤汪向日尚為恭順若諭以僧格桑鈴制其父妄肆鴟張今大兵進勦玉石俱焚不獨小金川從此滅絕即澤旺亦難倖逃顯戮父子之間必生離異其番目人等向為僧格桑驅脅未必堅心出力且僧格桑連歲稱兵番人耕作久荒資生無計亦必心懷怨恨若諭以禍福利害之分勢更無難解散至僧格桑雖冥頑無忌而痛加斥責亦可褫其魂而懾其心臣敬

將前奉

諭旨詳加演說擬繕檄文三道一諭澤旺一諭小金川
頭目番衆一諭僧格桑譯寫番字於小金川遣來
七人之内將頭目德實爾嘉及安本溫布一並拘
留其結迪等四人均屬愚蠢番夷即令賚檄前往
所有檄諭各頭目番衆之文另行多繕數十紙飭
其帶往分給再僧格桑罪大惡極萬無可貸而臣
檄稿内有開一綫生路之語者臣愚昧之見欲使

逆酋心有希冀不致併力死守且予以十日回信
之限使賊匪遲疑觀望間臣乘其不備即可前進
況逆酋此際具稟或聞大兵進剿故遣人前來以
為緩兵之策更當將計就計俾其猝不及防是以
臣於十五日將檄諭交與結迪等領回即于十六
日統率現有之兵前抵巴朗拉一帶覓路進攻諒
更易於摧破再番稟所稱沙木角拉一路在維州
以外係賊巢北界道路較遠合並陳明奏入

上諭軍機大臣曰閱僧格桑與馬詔蛟稟帖語多縱肆
實為法所不容斷難輕宥第察其前此將韓世貴送
出之意不過欲為將來窮蹙乞降地步今溫福所與
檄諭亦有開一綫生路之語若僧格桑果知悔罪親
詣軍營莫若將計就計擒縛逆豎寘之重典使番夷
各知儆惕至前諭令平定小金川後將其地分給就
近土司管轄以除後患今土司澤旺尚存第為伊子
僧格桑所制並未同其犯法是叛逆之罪專在僧格

桑若官兵進剿時澤旺與僧格桑濟惡逆命則亦不
宜輕遣如果別無違抗情節其罪尚屬可原又不必
照前諭之分地變置或即令澤旺于諸子中擇其誠
謹守法者襲伊土司之職亦無不可番衆見不法之
土司身伏刑誅而安分者仍得保全世職自足以戢
其桀驁不馴之心益當畏威懷德然須臨時酌量情
形分別妥辦必不可將就了事又滋日後反復也又
僧格桑稟內所稱沙木角拉係賊巢北界道路較遠

此乃賊人詭計斷不可信溫福惟當于巴朗拉一帶
探覓可進之路督兵進剿避其碉卡以免相持玩日
至賊首無故具稟必係聽聞另差將軍帶兵進剿欲
以此稟為緩兵之策令溫福既與彼檄諭使之心有
希冀並與以十日之限仍迅速進攻掩其不備甚得
行軍要領務當實力勉為之至攻剿時令土兵在前
官兵在後土兵見官兵柔弱一有動搖輒思奔潰此
等情節朕早鑒及曾經明晰飭諭令果不出所料似

此調度失宜阿爾泰董天弼皆不能辭罪但董天弼
身係武夫其功罪賞罰與阿爾泰不同而董天弼兩
次進攻似尚覺勇往惟漸染綠營欺詐惡習實為可
恨如經朕屢次訓飭之後深知畏懼力圖奮勉自効
尚可仍留提督之任令其帶罪立功若綠營錮習牢
不可破即當另為更易但董天弼是否於軍營有益
朕實不能遙度於數千里之外著溫福即速查明據
實覆奏候朕另降諭旨再千總韓世貴迷失之前

此並未據董天弼奏聞已屬非是而溫福摺稱聞董
天弼于十一月初七日分兵攻賊木城被賊衝下官
兵受傷及迷失者甚多且有遺失鎗砲之事等語其
事距今已及兩旬並未見董天弼奏到且自伊進兵
木坪及攻得甲金達以來朕心深為廕念屢次傳諭
令將攻勦情形速行奏報何竟隱諱不言此總係綠
營庸陋之見以挫失之事恐干處分欲俟稍有得手
再行附奏希冀功過相抵然此等情節關係緊要豈

可匿不上聞著交溫福桂林切實查明具奏至總兵
福昌雖所帶之兵疲病者多然在巴朗拉數月一籌
莫展看來亦屬無用之人且觀其日後奮勵若何再
行定其功罪其自賊營前來投稟七人溫福將頭目
二名及溫布一例留住所辦尚是但德實爾嘉人既
狡黠僅爾尋常訊問未能得其實情自當嚴加刑鞫
務令逐一供吐庶可得賊巢真實底裡仍著訊明錄
供具奏至小金川係給印土司何以僧格桑文稟又

用演化禪師印信並著查明一併奏聞

上又諭軍機大臣曰前據溫福奏酌量情形飛咨陝甘
貴州督撫調取所派之兵是現在川省必須添兵協
助更可尅期集事著傳諭文綬李湖接奉此旨即將
派定之兵及所派帶兵將領迅速起程遄行赴川應
用無得刻緩至桂林等請招募新兵事屬可行即照
所奏妥辦

甲子董天弼奏言臣於十一月初一日攻克甲金

達上面山梁碉卡據守牛廠嗣于初五日夜賊番
來營侵擾被我兵鎗傷多人又搶獲攬牌等項軍
械臣查由牛廠前進達木巴宗其間尚有路口可

通小金川須先據守絕其應援初七日派兵由西
北山梁前往適遇賊番據險官兵上前勦殺互有
損傷是夜又踰溝潛來直犯牛廠營盤其東北橫
亘山岡防卡各兵馳下接應不虞另有番賊衝上
山岡佔去石卡臣于初八初九兩日督兵奮力攻

奪賊番添人堅守驟難攻克臣以牛廠營盤相去石卡不遠即令漢土兵練撤上山梁於總要路口屯扎初十日夜賊番復來侵犯被官兵擊敗惟是甲金達山梁總口並各處要隘糧臺均須撥兵加意嚴防至甲金達相近尚有可通達木巴宗之路現在跣探進攻所有未能嚴兵防守失卡之遊擊曹永言都司福敏泰咎有攸歸臣亦未能防範周密實難辭責應請

旨一併交部嚴加議處再侍衛海祿官達色帶領成都
滿兵四百名及總兵牛天昇副都統常保住先後
于十一十五等日到甲金達軍營合併陳明奏入
上諭軍機大臣曰董天弼奏已經攻得之牛廠石卡復
為賊奪去且於官兵損傷迷失及遺失鎗砲之事皆
隱約其詞希圖掩飾竟是深染綠營惡習甚屬不堪
董天弼屢次得而復失其咎實無可逭但伊現在統
兵進剿若另易生手轉恐難于著力且一時亦難得

堪勝帶兵之提督是以所請議處不即交部總之伊等功罪自在或尚知奮勉可以酌量相抵或仍畏蒞貽悞自速重愆絲毫不能假借此時尚難于遽定統俟成功之日再行核實辦理至常保住現已至甲金達軍營與董天弼會合常保住帶兵自較綠營將領得力但伊本係烏拉齊且任總兵數年或不免染外省綠營習氣今與董天弼一路恐亦蹈其惡習仍不足恃而約咱一路惟有一宋元俊稍習地理然帶兵

之是否勇往無由深悉桂林在彼不可不隨時試看策勵以期於事有益至溫福現已馳至巴朗拉扼其要害而五岱又係優於帶兵之人較彼兩路自能制勝但其地山嶺險峻並與賊巢相近礮卡又多進剿亦非易事該處所有川兵不及二千且漢兵土練遇事俱不足仗萬一稍有退阻僅存溫福所帶之滿洲兵二百名其勢未免單弱溫福前奏至彼察看事機如刻難少待即就現有之兵奮力前進固屬勇於任

事但亦不可不詳審形勢明於彼此進退之機方可
進攻若銳意深入兵力不充賊人既無所畏憚且恐
約咱甲金達兩路未能同時合剿更不足以壯聲援
稍有疎虞於大局甚有關係溫福務當善體朕心加
意慎重董天弼兩路惟恐其懈於急攻溫福一路則
惟恐銳於輕進廛念相同而於溫福尤甚將此詳悉
傳諭知之

臣等謹按鄂克什被圍已久拯溺救焚其勢似

難刻緩但行兵機要必須計出萬全

皇上特因兵力稍單勗以無庸輕進嗣由已朗拉初次
進攻未能得手既不加之責備轉以勇往可嘉
交部叙錄敬慎寬恕之

聖心盎然流溢非如前代用兵迫於見功而苛於馭下
者所能庶幾萬一也

同日

上又諭軍機大臣曰董天弼前在德爾密奪取賊碉及

在牛廠佔據石卡似皆能奮銳進攻但兩處俱得而復失是其於防守之道全未留心必係狃於綠營陋習專仗土練守禦而無能之綠營兵衆率皆畏葸觀望領兵將弁又不知督策而前一遇賊至輒爾動搖奔潰前已量及於此嚴行飭諭董天弼何以迷而不悟耶至董天弼前奏鄂克什土司遣其弟自達木巴宗逸出相訂內外夾擊此實可乘之機正當竭力上緊攻打何又日久逗留不往至此次摺內始云在甲

金達相近跣探可通達木巴宗之路則董天弼在甲
金達一帶住將兩旬所辦何事一切情節著董天弼
即行明白回奏

丙寅桂林奏言十一月十六日宋元俊稟稱有小
金川頭人在卡外喊稟賣投文書呈送禮物臣令
接稟交與通事譯出內稱鄂克什與伊有仇是以
報復明正人民係其自欲往投並不敢犯法各等
語臣思僧格桑去歲甫受約束旋又逞兇令大兵

壓境猶敢恃險憑礮肆行抗拒閱其稟內不知畏
罪仍以恩仇報復為言是其冥頑無知不可復以
語言化誨但既經具稟未必非巧於嘗試之計且
我兵分路進攻尚未受創是以敢於稟詞搪塞不
可不曉以大義示以兵威使知鄂克什土司非僧
格桑可以報仇明正地方非僧格桑可以私佔用
懾其跳梁肆橫之心當即臚列僧格桑罪狀撰擬
檄文差弁持至卡外面示該頭人諭以汝等助逆

違天將來擣穴擒渠萬無生理今可將此遍示頭
人百姓共知現在小金川肆逆罪在僧格桑一人
汝等本屬脅從如有擒逆呈獻者即令各安生業
倘復仍前抗拒大兵到處玉石俱焚毋得執迷不
悟自取滅亡奏入

上諭軍機大臣曰僧格桑跳梁肆惡抗拒官兵非擣穴
擒渠不足以示懲創或乘其窮蹙乞憐自赴軍門就
勢繫縛不可致倖逃法網前降諭旨甚明今看所投

文稟詞意鴟張縱恣其非畏我兵威哀籲乞命可知
所有賈稟頭人自應即時拘執嚴刑跟究庶得賊巢
確實情形攻勦亦易為力乃以似此緊要賊人竟行
放縱回巢而所辦檄諭意類調停並不辭嚴義正殊
出意料之外桂林著嚴行申飭令其早行猛省一切
殫心上緊籌辦毋自取戾

同日桂林阿爾泰奏言臣等連日放砲攻擊已推
倒大礮一座其相連礮寨亦多殘毀揆度情形無

難撲取因大寨勢處山脚低平之地而各處山腰
碉卡建高臨下賊番餘砲環攻得後亦難據守恐
反有得而復失之虞臣等親加審度扎壘山北賊
卡甚多山勢陡險防守完固雖噶中山後有一路
可通小金川但須由巴旺及布拉克底經過金川
地方兼有雪山難以繞越臣等公同籌畫惟一面
仍用大砲日夜攻擊大寨俾賊番不及補修一面
盡力攻打西北兩面山腰碉卡使賊番不能藏身

即可乘勢分撲奪佔碉卡之後擬潛由約咱山下
斷其歸路可以不攻自破過此山梁即係小金川
卡了地方必須渡河方可進取查軍營僅有皮船
載人無多浮行甚險臣等現在飭令多伐木植編
筏備用俟約咱一得即行取道渡河相度山勢分
兵攻取達烏以期迅速前進謹繪小金川全圖並
約咱一圖詳細貼說

進呈又奏言小金川路通金川之處需用重兵防範

現在兵力不敷奏請於附近之陝西湖廣貴州三省添調官兵八千名業經飛咨各該省挑選精銳預備仰懇

勅令各督撫即行起程以期迅速再小金川地方在在堅礮進取利用大礮所需火藥甚多川省產硝有限恐一時購備不及並飛咨撥兵之三省除各兵儘數備帶外仍於各省存貯火藥內酌撥十分之六運送川省接收轉運各路軍營奏入

上又諭軍機大臣曰前據溫福奏川省現兵尚屬不敷
須調黔陝之兵備用已有旨諭李湖預選精兵二千
文綬預選陝甘兵三千遴派帶兵將領迅速遄行赴
川聽候調用今據桂林奏業已分咨陝黔湖廣三省
揀派官兵候旨即令起程等語楚兵本屬懦弱未必
適用是以未經派及且距川省較遠于事無益其已
調之陝甘貴州五千兵自當迅速赴川備用著再傳
諭文綬李湖此項官兵如已起程在途即速催趲赴

川聽候溫福等調遣所需火藥鉛丸等項亦即速運
往以資應用

上又諭軍機大臣曰閱桂林等所繪約咱圖內形勢南
面係官兵屯駐其東西亦俱有官兵攻得之處惟東
北及北面尚係賊人拒守計賊酋美諾巢穴必在約
咱之東北其西北山口亦係約咱通賊巢要路此處
相近貼有新得小金川戰礮三座現添屯練把守黃
簽而距官兵營盤亦不甚遠因用硃筆標記若於此

處派能事將領帶兵駐守或可以斷賊巢來援約咱之陸路又東北河口一道似亦與賊巢相通河東岸貼有兵練卡倫黃簽其西岸亦簽有官兵攻得賊碉之處是我現在兵勢尚可控馭及之因於河口亦用殊筆標記若派兵守禦其地並可斷賊來援約咱之水路如此兩路阻扼則約咱賊寨饋援不繼勢必不攻自潰較之用砲轟擊豈非事半功倍何未計及于此著傳諭桂林照殊筆指示之處即速妥協辦理仍

將情形奏聞再閱小金川地圖約咱在美諾之南已
是小金川地界雖云係賊巢後路但距美諾甚近由
此進攻未為不可何以桂林前奏以約咱一路為無
關緊要列為最末至董天弼所據之甲金達亦距美
諾不遠朕意解達木巴宗之圍不過因救鄂克什土
司如統兵大員能覓間道徑趨美諾擣其巢穴則達
木巴宗並可不攻自解若僧格桑在達木巴宗攻禦
則董天弼一得美諾後即統兵趨赴達木巴宗與西

路救援達木巴宗之兵前後夾擊僧格桑自當立就俘擒董天弼何以並未計及于此然朕不過就圖而言恐圖中形勢舛錯不可徒稱遵旨而行也著傳諭董天弼相機妥辦迅速覆奏至巴朗拉一路據圖看來距美諾賊巢最遠且山嶺險峻何以溫福桂林皆云其地進攻為小金川正路今溫福駐兵在彼又作何覓間進攻至畢旺拉一路董天弼曾奏於彼處尋覓徑路今閱圖內畢旺拉與沙木角拉相近沙木角

拉即賊人前稟內詭稱欲官兵由彼路進者賊人於此必多設備是畢旺拉一路即有間道不宜輕進溫福更不可不知至各路現兵不少何以不敷應用總由阿爾泰等不善調度每得一碉卡即留派一起官兵屯守以至兵勢愈分愈單甚為非計我兵已得之碉卡如地當險要可以控扼賊衝自當留兵防禦若非緊要處所即應將所得碉卡盡行撤毀以絕賊人佔據之資較之處處屯兵豈不省便何不此之務而

專恃多兵以張聲勢著傳諭溫福桂林實力妥辦各將現在進剿情形迅速覆奏

臣等謹按省人碉座多在山路阨塞之地故每
碉番衆雖不過數十人而一為所據大兵即難
越過嗣後小金川初定如帛噶爾角克大壩溝
簇拉角克溝諸處碉座議者謂可供存糧之用
貪小利而忘大害均未剷除以致木果木失事
時兩金川番衆分據各碉貽患於官軍不淺伏

讀

諭旨令將所得碉卡盡行拆毀以絕賊人佔據之資實
為至當不易如此情形統兵諸臣親臨其地乃
不能察及之而八千里外

皇上睿照所至早為發蹤指示思患預防之道固已無
微不至矣

平定兩金川方略卷十一